

Felix Chakutoe, héroe nashonal

20 di Mei 1984 a reuní na boka di haf, ku bista riba laman, na punto di Klipstraat, un gran kantidat di persona pa honra i desvelá e promé portrèt di bròns di héroe nashonal, Felix Chakutoe (1891-1967).

Tabata un akto na unda sindikalismo, gobièrnu i sektor priva, a uni - despues di algun diskushon - pa honra i konmemorá un fundadó di sindikalismo, di demokrasia i libertat.

A rekordá Chakutoe, su orígen humilde , -su mama Ana Hooi tabata traha serka un famia na Pietermaai. Komo mucha el a bai St. Vincentiusschool. Felix a buska un entrada èkstra, ora e no por a haña trabou el a disidí komo yònkuman di bai nabegá. Komo marinero despues di su regreso di un biahe na New York, na 1922 a ripara di gran desgusto i rabia por trato inhustu serka trahadó di haf, ora doñonan di kompania di barku a baha pago di 50 sèn pa ora pa 40 sèn.

El a tuma e liderazgo di un wèlga i su kastigu pisa di 9 aña enkarselamentu. Pero ora el ta liber atrobe, despues di 3 anan, i ku yudansa di su mama, el a haña un otro kastigu: kastigu popular di keda lubidá, marginalisá, i el a biba komo bendedó di brièchi ilegal.

Chakutoe tabatin gana di sa si tabata balapena lucha pa pueblo di Kòrsou. A bini kontesta riba tal pregunta den un homenahe konkreto, mas di 20 aña despues di su morto.

Fundashon pa Promové Potretamentu di Antiyanonan di Renombre', fundá na 1983 netamente pa saka for di olvido e sorto di yunan di tera akí ku a destaká, pa duna un señal ku mester duna balor na nos propio hende. A dedik'é na realisá un portrèt (o sea un kabes) di Chakutoe komo un di e promé Portrèt.

E iniciativa pa eskoho di Felix Chakutoe a bini di sindikatonan i di gobièrnu (entre otro difuntu Willy Franco) i e proyekto a risibí sosten di sektor privé. A aserka e Fundashon su presidente, sra. Violeta Eustatius, i enkargá e artista di Sürnam Erwin de Vries pa traha un portrèt di bròns i koper, ku tin mashá paresido ku e persona Chakutoe. Pero tabatin kítika tambe pa e echo ku a pone un eskultura di un kabes so na un lugá pafó. E kítika akí a kondusí na un petishon di CCTC, e.o. Oscar Zetmeel i Kenneth Valpoort na 1989 na Gobièrnu di Kòrsou i a enkargá Fundashon Portretamentu di nobo en enkargo di kontratá sr. De Vries pa e traha un portrèt nobo. Esei a keda desvelá dies aña despues (1994), E biaha akí un busto. A kambio di e portrèt ku despues a haña un lugá na e grupo di patfender na Bándabou ku nòmber di Chakutoe.

Ta parse ku e turbulensia rònt di e gran pionero di nos derechonan humano Chakutoe a persigú su busto tambe. Na fin di mei 2010 a resultá ku e busto a somentá fo'i riba su base na su pleinchi aki. E balor material tabata aparentemente mas importante ku e balor inmaterial, e balor patriótico di e ladron, pero a ripara ku nos generashon nobo no sa tampoko ken ta e persona di Felix Chakutoe.

Ku yudansa di prensa, i di polis algun dia despues a haña e busto bèk ku nan a zag na pida pida. Polis a entregá na Adrie Williams di CGTC i Ieteke Witteveen di NAAM e pidanan.

For di momentu di robo ei interes pa e héroe aki i su herensia a rebibá. CGTC i NAAM a uni forsa, a rekolekta fondo pa restourashon i a traha un eksposishon riba su historia i herensia.

Ta bon pa menshoná ta ku tur e sèn ku a dreña ta di hende i sektor priva, i di sektor sindikal.

Un komishon profeshonal di restourashon a opta pa laga e restourashon di e busto na man di e konosí brongsteterij Volkers. Na yanüari 2011 e trabou a finalisá i ekspertonan manera Hortence Brouwn i Jennifer a deklará ku e trabou di restourashon tabata hopi profeshonal. 'E busto i kara restourá ta kompletamente di akuerdo ku e original di Erwin de Vries', segun nan.

Na okashon di 1 di mei 2011 a revelá e busto di Felix Chakutoe pa di dos biahe durante un seremonia prepará pa organisashonnan sindikal.

Kiko ta e balor di monumentonan dediká na nos héroenan, esun di antes i di awe?

Den su charla na okashon aki, sra. Witteveen a enfatisá ku monumento i estatua ku bustonan ta duna un bista mas profundo i transcendental di historia. Asina nos ta keda kòrda persona- i eventonan ku a hunga un papel históriko i nan ta forma parti di e memoria kolektivo di un nashon. Ta pa spera ku e herensia bibu aki ta sigui inspirá nos lidernan aktual den nos lucha kontra inhustisia, diskriminashon i desigualdat. I ku ta inkluí tur trahadó den nos solidaridat, tambe den sektor informal. Asina, dokumentando i enrikesimentu nos memoria kolektivo, nos por surpasá divishon temporal i logra un kòrsou mas humano, mas liber i mas emansipá."

Fuente: Diskurso Ieteke 'Inchi' Witteveen (direktor NAAM) 1 di mei 2011, na okashon di desvelá e busto restourá di Felix Chakutoe.